



Broj: SuPK- 871/14
Brčko, 27.10.2014.godine.

Pravosudna komisija Brčko distrikta Bosne i Hercegovine, na osnovu člana 14. stav 1. tačka u) Zakona o Pravosudnoj komisiji Brčko distrikta BiH («Službeni glasnik Brčko distrikta BiH» broj 19/07, 20/07 i 2/08) i člana 21a Zakona o zaštiti ličnih podataka u Bosni i Hercegovini, ("Službeni glasnik Bosne i Hercegovine" broj 49/06, 76/11 i 89/11), na sjednici održanoj dana 27.10.2014.godine, donijela je sljedeću

ODLUKU

Član 1 (Predmet)

Ovom Odlukom utvrđuju se uslovi i način vršenja video nadzora.

Član 2 (Svrha)

Video nadzor pristupa službenim prostorijama Osnovnog suda Brčko distrikta BiH, Apelacionog suda Brčko distrikta BiH, Tužilaštva Brčko distrikta BiH, Kancelarije za pravnu pomoć Brčko distrikta BiH, Pravobranilaštva Brčko distrikta BiH i Pravosudne komisije Brčko distrikta BiH (u daljem tekstu: Pravosudne institucije) vrši se radi bezbjednosti lica i imovine, kontrole ulaska i izlaska iz službenih prostorija i gdje zbog prirode posla postoji opasnost po zaposlene.

Član 3 (Video nadzor)

(1) Video nadzor iz člana 1 ove Odluke vrši se nad prostorom: pristupa ulazima i izlazima iz zgrada, javnim površinama koji oivičuju objekte Pravosudnih institucija, arhiva, prostorija za čuvanje dokaza, prostorija za zadržavanje lica lišenih slobode, garaže i holova zgrada.

(2) Video nadzor nije dozvoljen u službenom i poslovnom prostoru van radnog mjesta, naročito nad sanitarnim prostorijama i garderobama.

Član 4 (Zbirka ličnih podataka)

(1) O video nadzoru iz člana 2 stav (1) ove odluke vodi se zbirka ličnih podataka.

(2) Zbirka ličnih podataka iz stava (1) ovog člana može da sadrži:

- a) snimak lica (sliku ili zvuk, odnosno sliku i zvuk)
- b) datum i vrijeme snimanja ulaska i izlaska
- c) lično ime nosioca podataka, njegovo prebivalište ili boravište i adresu, zaposlenje, vrstu i broj identifikacionog dokumenta, razloge ulaska, ako su lični podaci, koji su uneseni, prikupljeni pored snimka ili putem snimka sistema video nadzora.

(3) Lični podaci iz zbirke ličnih podataka iz stava (1) ovog člana čuvaju se najduže trideset (30) dana od dana nastanka.

(4) Uvid u zbirku ličnih podataka, iz stava (1) ovog člana, može se dozvoliti Tužiocu i ovlašćenom službenom licu Policije Brčko distrikta BiH.

(5) Snimci sa video nadzora se mogu izdavati i drugim licima u skladu sa zakonima koji se primjenjuju u Brčko distriktu BiH.

(6) Za uvid i dobijanje ličnih podataka iz zbirke ličnih podataka lica iz stavova (4) i (5) ovog člana dužna su podnijeti pismeni zahtjev Pravosudnoj komisiji.

(7) Predsjednik Pravosudne komisije, ili lice koje on ovlasti, donosi rješenje o usvajanju ili odbijanju zahtjeva za uvid i dobijanje ličnih podataka.

Član 5 **(Obavještenje o video nadzoru)**

(1) O uvođenju video nadzora istaći će se javno obavještenje na vidnom mjestu na način kojim se obavještavaju lica da se vrši video nadzor nad prostorijama – prostorom Pravosudnih institucija i to prije početka vršenja video nadzora, a najkasnije u trenutku kad počinje vršenje video nadzora.

(2) Obavještenje iz stava 1 ovog člana sadrži podatke o:

- 1) kontroloru video nadzora;
- 2) broju telefona i adresi gdje se mogu dobiti informacije gdje se i koliko dugo čuvaju snimci iz sistema video nadzora.

(3) Obavještenje iz stava (2) ovog člana je znak veličine 50x25 cm sa grafičkim simbolom video nadzora i natpisom „ZGRADA POD VIDEO NADZOROM“, ispisan latiničnim i ćiriličnim pismom.

(4) Isticanjem obavještenja iz stava (1) ovog člana smatra se da je lice obaviješteno o obradi ličnih podataka putem video nadzora.

Član 6 **(Zabrana pristupa)**

Sistem video nadzora koji se koristi za vršenje video nadzora Pravosudnih institucija mora biti zaštićen od pristupa neovlaštenih lica.

**Član 7
(Odgovorno lice)**

Odgovorno lice za rukovođenje sistemom video nadzora je šef službe informacionih tehnologija Pravosuđa Brčko distrikta BiH.

**Član 8
(Nadzor)**

Sprovođenje ove Odluke pratiće Stručna služba Pravosudne komisije Brčko distrikta BiH.

**Član 9
(Stupanje na snagu)**

Ova Odluka stupa na snagu danom objavljivanja na oglasnim tablama i web stranicama Pravosudnih institucija.



Dostaviti:

1. Oglasne ploče i web stranice Pravosudnih institucija;
2. Pravosudne institucije;
3. U spis;
4. a/a.